

– Մենք բողոքում ենք մտրակի դեմ, եւ նոյնը մե՞նք պետք է գործ դնենք, – ասաց նա:

Ես ոչինչ չպատասխանեցի:

Քանի թուպէից յետոյ վերադարձաւ հաջին, բերելով իր հետ թէ ջուր եւ թէ մի օթոց.

– Օրհնած, – ասաց նա կիսածիծաղ եւ կիսավշտացած կերպով, – դէ ասա ջուր եմ ուզում, էլ ուր ես չարչարում ինձ: – Կարծես նոր էր հասկանում, որ ես ջուր էի ուզում:

– Էլ ուրիշ ի՞նչ էք հրամայում, – դարձաւ նա դէպի Ասլանը, – շուկայից գնելու ոչինչ չունե՞ք:

– Դեռես ոչ, երբ հարկաւոր կը լինի մի բան պատուիրել, կը կանչենք ձեզ, – ասաց Ասլանը:

Յաջիի դէմքի վրայ երեւաց դժգոհութեան նման մի բան: Նա այն բարի սովորութիւնն ուներ, որ պատրաստ էր իր սենեակները բոլորովին ձրի տալ իր յաճախորդներին, միայն թէ ամէն ինչ նրա ձեռքով գնէին: Բայց, միեւնոյն ժամանակ, նա ուներ մի այլ սովորութիւն, որ ամենահասարակ ուտեստներ, որոնցմով լի էր բազարը, երբ պահանջէիր նրանից, նա միշտ դժոխարութիւններ կյարուցանէր: Օրհնակ, նրան ասում ես. «հաջի, կարո՞ղ ես մի փոքր հաց ու պանիր գնել բազարից»: Նա ուղղակի չի պատասխանի, թէ կարող եմ, այլ կասէ քեզ. «տեսնեմ, կարող եմ գտնել»: Նրա այդ անվճռականութիւնը այն նպատակն ուներ, որ ցոյց տայ, թէ մի անկարելի գործ է կատարում եւ յաճախորդին մեծ ծառայութիւն է անում:

Յաջին մի ցամաք մարդ էր, նիհար ծնօտները խնամքով ածիլած, եւ կոշտ մացառի նման ընչացքների ծայրերը կտրած, որոնք մի չար սովորութիւն ունէին միշտ բերանը մտնելու: Նրա դէմքի վրայ նշանաւոր էր երեւելի քիթը, որ կրում էր իր վրայ երկու բարձրութիւններ, որոնք, երկու գագաթների նման, միախառնուելով վերին շրթունքի հետ, կազմում էին մի երկար լեռնաշղթայ: Սխալ չէր լինի, եթէ ասէի, որ նրա երեսը բաղկացած էր ամբողջապէս քթից: Յաջիի կազմածքի մէջ նշանաւոր էին եւ ոտքերը: Թէեւ բոլոր տաճկաստանցիք՝ ծալապատիկ նստելուց՝ ծուռ ոտքեր ունեն, բայց հաջիի ոտքերը այդ մասում մի առանձին բացառութիւն էին կազմում: Նրանք, դէպի կողքերի կողմը անկանոն կերպով դուրս ընկնելով եւ հետզհետէ թեքուելով, ձեւացնում էին երկու աղեղնաձեւ կիսաբոլորակներ, որոնց ծայրերը, ներքեւից եւ վերեւից միանալով, մէջտեղում թողնում էին մի ձոածեւ տարածութիւն: Այդ էր պատճառը, որ նա կրիայի նման էր շարժւում: Թէ ի՞նչ գոյն, եւ